



Fwen Goengheij

恭 喜 歌

□ Lij Soujhan / 李守汉



Bineix bi duzma,
Raeuz caezgya vuenheij,
Ndae gvaq ndei saedcej,
Caez goengheij fatcaiz.

Bineix dwg manienz,
Va gomienz lai moq,
Giz youh bauq raemx mboq,
Cungj hohhoh fatcaiz.

Haibak daeuj goengheij,
Hoh raeuz ndaej fatcaiz,
Demsou cienz hix lai,
Riuvaivai gvaq ngoenz.

Goengheij coenz daih'it,
Hoh daihgit daihleih,
Bouxbox cungj vuenheij,
Lumj byaleix dingdan.

Daihngaih youh goengheij,
Hoh sueng heij daengz dou,
Ngaenz aeu laep daeuj coux,
Cungj bouxboux vuenyungz.

Daihsam youh goengheij,
Saecej foux hamdangz,

Ndwenngoenz gvaq ndaej rang,
Cungj angqyangz gvaqngoenz.

Goengheij coenz daihseiq,
Hoh guek engq fanzyungz,
Dangj bang raeuz duet gungz,
Cungj vunzvunz bienq fouq.

Goengheij coenz daihhaj,
Caez gwih max hwnj mbwn,
Saehnieb guh ndaej mwn,
Ndwn gwnznamh ndaej maenh.

Goengheij coenz daihloeg,
Roegenq daeuj guh saengz,
Hwnj ranz ndaej geij caengz,
Baengh dangj ndaej bienq fouq.

Daihcaet coenz goengheij,
Hoh bineix hwngvuengh,
Yinh ndei daj seiqfueng,
Bya caeuj luengq cungj riu.

Goengheij daihbet coenz,
Diuzdiuz roen cungj ndei,
Yienghyiengh guh hwnjbae,
Fukhwng meiz(miz) maqmuengh.

Goengheij coenz daihgouj,
Saedcej raeuj lumj feiz,
Lwgminz gvaq ndaej ndei,
Seizseiz geiq ndawsim.

Goengheij coenz daihcib,
Itcig ndaej daezsang,
Ndwenngoenz diemz lumj dangz,
Docih dangj aencingz.

Hoh daihgit daihleih,
Bouxbox ndaej vuenyungz,
Ngwzboengz bienqbaenz lungz,
Bouxgungz bienq bouxfouq.

Hoh seiqgeiq fatcaiz,
Sim vunz hai lumj va,
Caez fukhwng Cunghvaz,
Guekgya raeuz maenh'ak.

Hoh bineix ndeirad,
Ndwenngoenz ndat lumj feiz,
Bouxbox cungj fouqmeiz(miz),
Seiqgeiq mbouj you caiz.

Hoh vunzvunz souhlaux,
Faex nduk dauq biu ngaz,

Ndang cangq lumj dietfaz,
Song da lij caengz raiz.

Hoh cib cienz cib ndei,
Yienghyiengh ndaej fanzyungz,
Ndae duet hoj duet gungz,
Cungj vuenyungz vaiqvued.

Cibbet coenz goengheij,
Ciengq daengz neix ngamq yuenz,
Yied ciengq sim yied vuen,
Sing fwen cuenz doh doengh.

Sing fwen cuenz doh doengh,
Saehnieb hoengh lumj feiz,
Yied gvaq yied ndaej ndei,
Diemz lumj ceiz caemj dangz.

Diemz lumj ceiz caemj dangz,
Docih dangj aencingz,
Cujisiz Siz Ginbingz,
Vih lwgminz mouz leih.

Dangj bang minz cauhfuk,
Lumj faex nduk biu ngaz,
Hoh doh raeuz guekgya,
Ndae fanzvaz fouqgiengz.

Lauxsaed Soujsaenq

诚 实 守 信

□ Veiz Mingzsenh / 韦明宣

Gijmaz dwg lauxsaed soujsaenq?
Gou nyinhnaeuz, lauxsaed soujsaenq
couhdwg mboujguenj dwg doiq boux-
laux roxnaeuz lwgnyez cungj mbouj
yaeuh, cungj gangj saenqyung, fanz
saeh dapwngq gvaq vunz le couh
itdingh bae guh baenz.

Vahsug gangj "vunz fouz saenq
mbouj laeb, guek fouz saenq mbouj
ak". Daj lij iq mwahaenx, raeuz
bouxbox cungj dingqgangj gvaq aen
goj 《Manaez Daeuj Lo》neix. Ndaw
aen goj neix dwg gangj boux lwgnyez
he aenvih dawz yaeuh gyoengqvunz
daeuj guh'angq, doeklaeng mbouj miz
vunz caiq saenq de le, couh deng duz
manaez haeb gwn lo.

Lauxsaed soujsaenq dwg gij
gaenbonj an ndang laeb mingh boux-
vunz raeuz. Gyoengqvunz moix ngoenz
cungj aeu caeuj gak cungj gak yiengh
vunz doxyouq. Danghnaeuz raeuz
mbouj gangj saenqyung, bouxboux
raen le cungj deuz gya'e gya'e bae.
Raeuz couh bienqbaenz boux vunz
dog, mbouj miz saek boux baengzyoux
lo. Seizdaih bienqvaq baenz mbwn
boek, doenghgij gangj saenqyung
vunz hungmbwk haenx lai raixcaix,
couh lumj ndaundeiq gwnz mbwn
deihraenraen, geq hix geq mbouj liux.

Lumjbaenz ciuhgeq Sangh Yangh laeb
faex ndaej saenq, ndaej daengz
gyoengq vunzbiengz saenqnyinh le,
swnhleih doihai fap moq de.

Cungguek moq laebbaenz le,
Sung Ginglingz dang gozgyah fucujisiz,
miz baez ndeu de bae ndaw guh-
wzyen yawj lwgnyez, Sung Ginglingz
naeuz, daengz 6 nyied 1 hauh
wzdungzcez de lij daeuj yawj gyoengq
lwgnyez neix dem. 6 nyied 1 hauh
iekdingh seizgan daengz lo, hoeng
gwnz mbwn doek fwn gig hung, lumj
miz vunz aeu bat coux raemx daj gwnz
mbwn dauj roengzdaeuj nei. Gyoengq
lauxsae caeuj lwgnyez muengh rog
ranz fwn doek baenz hung, nyinh-
naeuz Sung Ginglingz haengjdingh
mbouj daeuj lo. Sawqmwh, gij
ngaenzndang sug Sung Ginglingz
okyienh lo. Gyoengqvunz raen le,
cungj angq dwk swenj hwnjdaeuj,
foux hwnjdaeuj lo. Doenghgij saeh-
laeh neix gaenq sij baenz faenzcieng
ndei riuzcienz roengzdaeuj. Doeng-
gvaq gij saehlaeh neix, hawj raeuz rox
daengz gangj saenqyung dwg youq-
gaenj dangqmaz.

Hoeng, youq ndaw swnghhoz
raeuz, miz haujlai vunz vihliux gouz
aeu gij leih'ik ceiq hung ciheij couh



Gyoengq bya humx raemx dah.

Goh Cungdingz ingj

dawz gij liengzsim bonjfaenh, dawz gij
lauxsaed soujsaenq bonjndang vut
roengz namh hawj ma gwn lo.
Lumjbaenz "Sanhluz naijfaenj" saeh-
gienh, haih dai geijlai vunz. Bineix
gij "yi' myauz gyaj" saehgienh neix,
cungj dwg gig haih vunz. Vihmaz
baenz yienghneix? Couhdwg gij giyez
neix mbouj gangj saenqyung, cauh ok
gij doxgaiq gyaj neix okdaeuj haih
vunz. Vihmaz gyoengqvunz henz roen
cungj bae mbaet makfiengz gaj hawq,
Goengmax cungj mbouj bae. Aenvih
Goengmax roxnyinh daengz, gag
hanhhaed ciheij couhdwg doiq
gyoengqvunz gangj saenqyung.

Gou youq Gvangjsih Minzczu
Dayoz beizyin gaenq miz 10 lai ngoenz
lo. Baeznaengz cuengqhag bae

fandangz gwn haeux, ndaw fandanz
vunz gig lai, hoeng bouxboux cungj
gag baizdoih bae aeu ngaiz, mbouj-
guenj vunz baenzlawz lai, baenzlawz
ndaet, cungj mbouj miz saek boux
luen cap doih. Bouxbox cungj dwg
gwn geijlai couh aeu daek geijlai,
mbouj haengj lw saekdi.

Lauxsaed soujsaenq dwg gij
conzdungj meijdwz Cunghvaz raeuz,
guekgya wnggai dingh ok gveihcangh
cidu daeuj, hawj gyoengqvunz rox
daengz lauxsaed soujsaenq miz fap
ciuqguh. Doengzseiz, lij aeu dauqcauq
haeujlaeg senhconz, hawj vunz cungj
rox maz dwg lauxsaed soujsaenq.

Gyonj daeuj gangj, bouxvunz fouz
saenq mbouj laeb, aen guek fouz
saenq mbouj ak.